



DISPUT

ETRE

MOLARJES ACAR C'HORAIS.

MOLARJES.

ME a garre gout, Coraïs du,
Da beleac'h e zes-te gant da ludu?

AR C'HORAIS.

Me a ya da ober couës,
Da zilasteza Molarjes.
Da faç a zo quer vil ha quer lous
Ma zout envel eus eur marmous;
Da fri a zo rus ha bronduet
Evel eur pesquic moguedet;
Da zaoulagat a dro en da ben;
Da vleo a velan quen disquempen;
Da zillat a zo leun a lastez:
Anvet mat out bet Molarjes!
Eur c'houës cren a renquor sur
Da ober dide chench a figur.

MOLARJES.

N'en deus nemedout-te, Coraïs fal,
A deu d'am blam ha d'am zamal:
Quement am guël, pa deuan er vro,
Am receo tout, ha mal ganto.

N'en deus na rost na pasteziou,
 Nac anduillen na chambonou,
 Na bevin leue na quic maout
 Na breparer, pa aller caout;
 Na cabonet nac ouïdi,
 Quefeleguet na clujiri;
 Mar caver guin mad ebars er vro,
 Ha pa goustfe quer, querc'het e vo
 Da ober fest da Volarjes:
 Ha pa rancfet soufr goude paourentes,
 N'en deus na paour na pinvidic
 Na breparont quic pe zilzic,
 Ha na renquont caout boutaillat,
 Ha pa ranquent guerza dillat,
 Da ober fest da Volarjes.
 Mes te, Corais ques, ne c'heus na mignon
 na mignones.

Quen didruës e zout oute
 Ma lames o bues digante,
 Ma spontont ha ma zeblantont,
 O clevet coms demeus ac'hanout:
 O laza a res gand da yuniou
 Ha disec'ha o oll memprou.

AR C'HORAÏS.

N'en de quet ar yun en deus ar brud
 Da ziverra bues an dut;
 Er c'hontrol eo an excessou
 A zo goas eals d'ar c'hlenvejou.
 Te a c'heus lazet meur a ini
 Gant gourmandis ha mesventi;

Te a lam digante o squiant,
 O reson hac o jujamant,
 Hac o laqua da alteri,
 Goude antren e furnezi,
 Hac o lezo var ar pave
 Goude o zreti evel-ze.

Ne ouzon quet penos e chommont beo
 Goude ar pes a res-te deo.

Un debes a zebauch a ves gret
 A gustum da vea control d'ar yec'het
 Mui evit ar C'horais,
 Ha pa batfe tri na pevar mis.

MOLARJES.

Tao, Corais; un diout out.
 Ar vedecinet a gle gout
 Petra so mat doc'h n'en de quet
 Da gonservi ar yec'het;
 Ar vedecinet, gouscoude,
 Cals anezo a ev guin ive,
 Hac efa caër, pa roer dezo,
 Bete memes coeza mezo.

AR C'HORAIS.

Me a oar erfat e rentet dall
 Medecinet couls ha re-all.
 N'en deus nicun anezo ne ouzont erfat
 Petra so mat doc'h n'en de quet
 Da gonservi ar yec'het:
 Cals a re-all a bareont
 Hac o-unan en em lazont.

MOLARJES.

N'en deo quet ret en em laza
 Evit na debri nac efa :
 Me n'em beus quet a c'hoant e varfe den;
 Me garre o guelet tout laouen.

AR C'HORAÏS.

Eh bien, guir eo; pa zeont eus da dol,
 Laouen hac adal e vezont oll.
 Perac? En imor vad o lequeer
 Gand ar cher vad a breparer;
 Mes, Molarjes, un traïtour out :
 Abars ma zeont en o rout,
 E lequeer cals demeus anezo
 Da chench imor, pa vezont mezo,
 Ha da ober mil follentes
 Goude da laouenedigues.

MOLARJES.

Pe seurt follentes a reont-i?
 Lavar dime ta, mar greont-i?

AR C'HORAÏS.

Pe seurt maleur ne erru quet
 Oc'h da heul-te, tra milliguet?...
 Coll an enor, coll ar madou;
 Col ar vues gant corfadou?
 Ha bet goas hac a bet maouës
 En em dizenor assambles?
 Hac enorabl eo d'ar merc'het
 Quemeret habijou goaset;

Laquat masclou var o bizach
 Evit redec gant tud volach?...
 Hac enorabl eo d'ar voazet
 Quemeret habijou merc'het
 Evit mont etouez ar gragues
 Da ober mil fallagries?
 A bet emgan, a bet querel!
 Hac a bet den a renq mervel
 Divar da ben-de, Molarjes,
 Goude da laouenedigues!....
 C'hoas, a bet den, divar ar guin,
 Er c'hoariou en em revin
 Hac a gol en un nosves
 Mui ma na c'honzont en eur blaves!
 Nac a bet mallos a roer dide
 Gand ar chagrin a ves goude?.....

MOLARJES.

Oh! me a ra goab deus ar maloziou
 Hac em bes goal bedennou!
 Derc'hel tinel eo va etat
 D'an nep a gar ober cher vad,
 An nep en deus hoant da vont deus va zol,
 D'an nep a gar a zo friol;
 Mes te, Corais, a zo un insolant
 Dont d'am choqui injustamant,
 Ha ne ouzot te quet, en eur guer,
 Deus piou e c'heus affer;
 Car me a zo savet a lignes vad,
 Quen abers mam, quen abers tad.

AR C'HORAÏS.

Deus a beleac'h, tra affrontet,
E zouch dide e zout savet?

MOLARJES.

Me a so savet a lignes Noë
A voa mignon bras da Zouë.

AR C'HORAÏS.

Guir eo Noë a efas guin
Mæs ne vouie quet e voa malin.
Da vesvi an dut evel ma ree
Biscoas banne ne efas re,
Na biscoas demeus e lignes
N'en deus bet den anvet Molarjes.
Deus an ifern e zout savet;
Satan en deus da enjandret
Ha da digasset var an douar
Da veza cos da vil glac'har,
Da vil emgan, da vil malheur
A ques var an nep a ya da c'heul!....
Eur fripon out, hac evel-ze
Me am beus urs a beurs Doue
Da ober dit quittaat ar vro
A teac'h prest, pe me da foeltro!....

MOLARJES.

Pardon, pardon, va C'horaïs!
N'en em laquit quet e malic,
Ha, mar plich ganeoc'h, o pet truez
Un neubet c'hoas oc'h Molarjes;

Ha mar quirit entent reson,
 Me am beus esper da gaout pardon.
 Me a rayo eur gonnession general,
 Fidel ha leal. Guir eo gueach-all
 E zon bet cos,
 Quercouls en deis evel en nos,
 Da ober cals a zispignou
 Gant cheriou mad ha c'hoariou :
 Mes, aboue pell a zo,
 An traou tout a zo maro ;
 Ne veler mui, da Volarjes,
 Nemeur a vin, na rost, na pastez ;
 Parconsequant ar c'hoariou
 A so et tout ervers abiou.
 Perac ta, Corais quez,
 E c'hourdrouzes-te Molarjes ?
 Pa na ra drouc ebet mui
 E zout oblijet d'e bardoni :
 An nep a govessa e bec'het
 A virit beza pardonet.

AR C'HORAIS.

Da gonnession-te, Molarjes,
 N'en de nemet affronterez.
 Ma na ret quet breman quement a voal
 Evel a c'heus gret gueach-all,
 E maout en dessing da ober,
 Peneverte ar guin a so quer :
 An taillou so bras hac ar guernes.
 Just a ra da dristidigues.
 Potret a c'heus hac a lequees c'hoas

Da ober cher vad couls a biscoas :
 Rac ze, coquin, ha te a gleo,
 En em den prest ermez ar vro
 Ha ne rezon quet davantach,
 Pe me foeltro var da vizach!....

MOLARJES.

Va mignonet, tostait aman :
 Ret e mont quit, var a velan!
 Et e zeo ar C'horais ac'han eun tu.
 Me gont e ect da guerc'hat ludu,
 E zonjeal va ampoezoni;
 Mes en em drompla a raï.
 Allas! breman, va bugale,
 C'houi a gavo un neubet quer se!
 Ar C'horais a rayo deoc'h
 Ober gual cher a nespè deoc'h;
 Mes, da viana, deus ar mintin,
 Cousquit da c'hortos o lein
 Ha ne savit quet deus o quele
 Quen a vo dec heur pe goude:
 Neuze en eur gavo eur mignon
 A brezanto collation.
 Eun tam scurmach, eun tam bara
 Gant eur chopinat n'en deo netra;
 Ar c'his commun eo quemèn-ze
 Ha ne dor quet ar yun an dra-ze.
 Laquit ar beriou hac al landeriou
 A ispil er chiminalou,
 Evit miret ne verglint quet,
 Evit ma cavet, pa vo ret.

Ar vessel hac al lingiri,
 List ar C'horais d'o guelc'hi.
 Couës a rayo gant e ludu
 Evit o guelc'hi, mar bezont du:
 Affer en devo anezo;
 Rac se, mar car en o guelc'ho.
 Ne nec'hit quiet, va bugale;
 Me deuyo d'o quelet adarre,
 D'o treti sur guel mar gallan
 Evit n'em beus gret er blo-man:
 An taillou a ziminuo
 Hac ar bed oll a drafico.
 C'hoarzin a rit, va bugale;
 Mes ret e deport ar mare.
 Erru an diaoul zont gant e ludu!...
 Me a ya da dec'het eun tu
 Evit n'em c'havo quiet aman:
 Adieu deoc'h a lavarane.
 Pa vin me et er mez ar vro,
 E sonjeo dean e vin-me maro;
 Mes en dra pado quiguerez
 Ne varvo biquen Molarjes!....
*(Molarjes a ya en e rout ;
 Merc'her al ludu a erru.)*
 Bonjour, consortet Molarjes:
 Emaoc'h oll e tristidiguez.
 Et e o mest, var a velan,
 Un tu benac eus ar vro-man;
 Mes eleac'h guela da Volarjes
 E clefac'h guela d'o folentez!....

Eur veach benac e tui Doue,
 Hac a ben eur mis, marteze,
 Da c'houlén diganeoc'h perac tra
 Oc'h eus torret ar bromessa
 O poa gret en o padiziant
 Da renonç cren d'an ærouant.
 An ærouant ha Molarjes
 So o daou deus ar memes lignes;
 Daou adversour int da Zoue
 Hac a zisplich d'e vajeste.
 Ho Toue o c'heus gret anean
 Queit a ma ze bet ebars er vro-man:
 Oc'h ilizou, d'e adori,
 N'en de bet nemet hostaliri
 Ha quement ti oc'h eus hentet
 Evit bea doc'h ar banquet;
 Eur banne guin guen a serviche
 Da zour biniguet, en antre;
 Evit antren, da celebri,
 An dol a vije e creis an ty;
 Evit matier a offeren,
 Eur voutaillat hac eur veren:
 Choazet o poa vit fabriquet
 Mest an ty hac ar botret;
 Evit ezanç da ezanci,
 Querniel butun da vutuni;
 Evit action a c'hraçou,
 Jestou lubric pe disputou;
 Evit zarmoner da zarmon,
 Un impudic pe eur bouffon.

auter

Da lavaret bavardiach.
 Evit c'hoarsin da Volarjes,
 Petra oc'h eus-hu gonezet?
 Dispign oc'h arc'hant oc'h eus gret
 Evit livra oc'h eneo
 Da Lucifer, dre o crimou!....
 Me a vel breman deus o pizach
 Oc'h eus regret d'o tiotach.
 Guelit breman d'o follentez
 Hac eur veach-all laquit evez;
 Hac evit caout remission,
 Grit da Zoue satisfaction.
 Requis eo, da Volarjes,
 Tri pe pevar repas bemdez:
 Er C'horais a po pe poan;
 Ne rit james nemet unan.
 Gret oc'h eus crimou isolant;
 Confessaït ta humblamant
 Ha choasit eur C'honfessour
 Ha na vo quet doc'h o humor
 Na doc'h ini Molarje;
 Tollit eves oc'h ar seurt se.
 Confessoret so, marteze,
 O deus gret diotach ive,
 O deus gret, quercouls ha c'hui,
 Da Volarjes, bete mesvi:
 Na dostait james deus ar sort-ze
 Da glasq absolven doc'h ene.
 Ma na ellit absolutant
 Yun ar C'horais antieramant;

Choasit eur C'honfessour santel
 Hac a vouezo mat e guentel:
 Interrojit-an var o tever,
 Petra a so mat da ober
 Evit tremen ar C'horais
 Eves intantion an Ilis.
 Beza e zeus Caziustet *Casnistes*
 Pere ne dint quet approuvet,
 Jesus, map Doue crouer ar bed,
 E zeo mest an ol Caziustet
 Hac a lavar e zeus daou hent,
 Unan ledan hac unan enq:
 Dre an hent enq e renquomp oll
 Bale partout, ep mont da goll.
 Baleomp eta dre an hent moan,
 Lezomp gant ar re-all an ledan;
 Ne c'houlennomp dispanç na graç
 Anes na ve necesser bras.

FIN.

« Imprimet var ar scrit-dorn, »

E TY VOR GUILMER, IMPRIMER-LIBRER, E MONTROULEZ,
 guech-all plaç ar pesqet,
 breman, ru a Aiguillon, taust da blacen Audiern,
 hac e traon ru St. Malani.